



Chattar la destinaziun cun agid d'ina vusch rumantscha

■ (lr) Vus giais tras Berlin ed ina vusch rumantscha As di dad ir a dretga suenter 100 meters per arrivar a Vossa destinaziun. N'As sentis Vus uschia betg tuttina in zichel da chasa a l'ester?

Armon Schlegel, redactor da la Televisiun Rumantscha ed en il temp liber «tüftler electronic», ha procurà per ina versiun rumantscha da la vusch dal sistem da navigaziun TomTom. Forsa in zichel encreschadetgna cun ir tras terras estras, ma surtut la mancanza dad ina vusch rumantscha tar ils systems da navigaziun, ha manà Schlegel sin l'idea da procurar sez per ina vusch rumantscha per quels apparats.

La firma TomTom ha dà ses consentiment per crear ina nova vusch e sco amator da computers ha Schlegel svelt chattà ina pussaivladad tecnica per realisar sia idea. *Nadja Cadonau* ha dà vusch als bain 50 cumonds che guidan sur las vias en rumantsch grischun.

La vusch e las datotecas rumantschas mettan Cadonau e Schlegel a disposiziun sut <http://www.navigaziunrumantscha.bunischem.ch/>

Da là pon ins telechargiar tut sin l'agen sistem da navigaziun. Ultra da la vusch datti anc in pèr extras rumantschs, sco per exempel il purtret da bainvegni ed il purtret che cumpara cura ch'ins serà giu il TomTom. Er ina varianta valla-dra cun si'atgna vusch ha Armon Schlegel creà.